

si affligé qu'il en pleura toute la nuit, et il vint le lendemain s'en Confesser coe d'une grande faute. Les françois sont merueilleusement edifiés de les voir pendant la messe reciter leur Chapelet a deux Chœurs, et pratiquer avec exactitude tous les autres exercices de pieté.

Dieu m'a faict connoistre par experience cette année qu'il faict misericorde a qui il luy plaict, et non pas a ceux a qui souuent les ho^{es}. voudroient bien qu'il l'a fit. Il a permis souuent que mes trauaux fussent viles a ceux a qui ie ne songeois pas et qu'ils fussent inutiles a Ceux po⁹ [qui] le salut des quels ie les entreprenois. au mois de Januier J'allay vers le petit lac de s^t. françois a deux lieues d'icy, J'y trouuay vn sauuage Chrestien moribond que ie disposay a la mort, J'auois dessein d'aller en vn endroit ou i'ayris depuis qu'un Jeune françois estoit a l'extremité; mais la nouuelle qu'on m'aporta que les outagamis estoient reuenus de leur chasse, et qu'il y auoit bien des malades parmy eux me fit retourner sur mes pas; cependant le Jeune françois mourut sans Confession dans vne Cabanne sauuage. Il auoit passé quatre mois auparauant deuant nostre Eglise; ie l'auois sollicité a se confesser, il n'auoit pas voulu me Croire, et Dieu en suite ne voulut pas luy faire retourner l'occasion qu'il auoit negligée. Estant arriué aux outagamis ie trouuay vn pauvre sauuage qui languissoit depuis long temps, et que ie disposay a la mort par le Baptesme. Dans le mesme endroit quoy que J'entrasse tous les Jours dans les Cabannes vn enfant mourut sans baptesme. parce qu'il mourut subitement vne heure apres que ie fus sorty de la Cabane ou il estoit, ce sont les plus grandes croix dont Dieu afflige vn pauvre missionnaire, mais il le Console quand il luy plaict. peu de temps apres ce[s]t accident [fut arriué] des sauuages arriuerent de nouueau, ie baptisay vn de leurs enfans qui ne faisoit que de naistre et